

# THOMAS, Syr ROBERT JOHN (1873 - 1951), gwleidydd a pherchennog llongau

**Enw:** Robert John Thomas  
**Dyddiad geni:** 1873  
**Dyddiad marw:** 1951  
**Priod:** Marie Rose Thomas (née Burrows)  
**Plentyn:** William Eustace Rhyddland Thomas  
**Rhiant:** Catherine Thomas  
**Rhiant:** William Thomas  
**Rhyw:** Gwryw  
**Galwedigaeth:** gwleidydd a pherchennog llongau  
**Maes gweithgaredd:** Diwydiant a Busnes; Gwleidyddiaeth a Mudiadau Gwleidyddol  
**Awdur:** John Graham Jones

Ganwyd 23 Ebrill 1873 yn fab i William a Catherine Thomas, Bootle. Addysgwyd ef yng Ngholeg Bootle, Athrofa Lerpwl, a Choleg Tettenhall. Dechreuodd weithio yn y busnes teuluol fel brocer yswiriant llongau a daeth yn yswiriwr llongau yng nghwmni Lloyds. Gwasanaethodd fel aelod seneddol (un o Ryddfrydwyr y Glymblaid) dros etholaeth Wrecsam rhwng 1918 ac 1922, safodd yn aflwyddiannus yn sir Fôn yn 1922 ac etholwyd ef yno mewn isetholiad yn Ebrill 1923 ar farwolaeth [Syr Owen Thomas](#). Parhaodd i gynrychioli sir Fôn yn y senedd hyd Mai 1929 pan ymddiswyddodd er mwyn medru rhoddi mwy o'i amser i'w ddiddordebau masnachol. Ei olynnydd yn yr etholaeth oedd y [Fonesig Megan Lloyd George](#) (gweler [Lloyd George](#), Teulu). Aeth yn fethdalwr yn 1930, ac ni chafodd ei ryddhau tan 1935. Yr oedd yn aelod o gyngor sir Môn a gwasanaethodd fel uchel siryf dros y sir yn 1912. Ef oedd sylfaenydd y gronfa er cof am yr arwyr Cymreig; rhoddodd £20,000 iddi a gweithredodd fel ysgrifennydd mygedol am flynyddoedd. Ef hefyd a sefydlodd yng Nghaergybi y Lady Thomas Convalescent Home for Discharged and Disabled Soldiers and Sailors, a phrynodd yr offer ar ei gyfer. Yr oedd yn Gymro Cymraeg, yn aelod o gyngor Coleg Prifysgol Gogledd Cymru, Bangor, ac yn drysorydd mygedol cymdeithas eisteddfodau Môn am 15 mlynedd. Urddwyd ef yn farchog yn 1918.

Priododd yn 1905 Marie Rose, merch Arthur Burrows, a bu hi farw yn 1948. Bu iddynt ddau fab ac un ferch. Ei etifedd oedd Syr William Eustace Rhyddland Thomas, (1909 - 1957). Bu farw 27 Medi 1951 yn ei gartref, Garreg-lwyd, Caergybi, Môn.

## Awdur

Dr John Graham Jones

## Ffynonellau

*Who was who?*

*Who's who in Wales* (1921)

*The Times*, 28 Medi 1951

*Dod's Parliamentary Companion*

*Mynegai Bywgraffyddol W. W. Price*

## Darllen Pellach

Archifau LIGC: [At Etholwyr Dwyrain Dinbych](#)

Erthygl Wicipedia: [Syr Robert Thomas](#)

## Dolenni Ychwanegol

Wikidata: [Q7528853](#)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/> 

Nghymru a thu hwnt.

Ewch i'n [tudalen codi arian](#) am ragor o wybodaeth.

